



1. Kom tot rus in God se teenwoordigheid

- Lees Psalm 130:5-8

⁵ Ek stel my vertrou in die Here, ek vertrou op Hom, ek wag op die verulling van sy woord. ⁶ Ek wag op die Here meer as wat die wagte op die môre wag, wagte op die môre. ⁷ Wag op die Here, Israel, want by die Here is daar troue liefde, by Hom is die verlossing seker. ⁸ Hy alleen sal Israel verlos van al sy sondes.

- Wag nou op die Here... deur vir 2-3 minute net in stilte te sit.

2. Aanbid Hom as Vader, Seun en Heilige Gees

- Gebruik Vonkklied 214 as raamwerk vir 'n gebed
Nog voordat ek 'n kind was, het U van my geweet.
Al die bene in my lyf het U reeds opgeskryf –
elke toon en elke voet, elke vinger en ook hand,
my arms en my bene, my kop en my verstand.

Refrein:

Want U is bo my, om my, langs my, agter en ook voor.

U is altyd in en by my, of ek ry en of ek bly.

Want U is bo my, om my, langs my, agter en ook voor.

U is altyd in en by my of ek ry en of ek bly.

- Fokus op God die Vader en Wie Hy vir jou is...
- Fokus op Jesus Christus en Wie Hy vir jou is...
- Fokus op die Heilige Gees en Wie Hy vir jou is...
- Aanbid en eer Hom as die Here van jou lewe.

3. Luister na die Woord – Lees Esegïel 37:1-14

¹ Die mag van die Here het my in besit geneem en my deur die Gees van die Here uitgebring en neergesit binne-in 'n laagte. Die laagte was vol bene. ²Die Here het my om die bene laat loop, en ek het gesien daar is baie bene in die laagte en hulle is baie droog.

³Toe vra Hy vir my: "Mens, kan daar in hierdie bene weer lewe kom?"
Ek het geantwoord: "Nee, dit weet net U, Here my God."

⁴Hy sê toe vir my: "Tree op as profeet vir hierdie bene en sê vir hulle: Hoor die woord van die Here, droë bene! ⁵So sê die Here my God vir hierdie bene: Ek gaan gees in julle laat kom sodat julle kan lewe: ⁶Ek sal vir julle senings en vleis aansit en julle oortrek met vel en dan sal Ek gees in julle gee sodat julle kan lewe. Dan sal julle besef dat Ek die Here is."

⁷Ek het toe as profeet opgetree soos ek beveel is, en terwyl ek dit doen, hoor ek 'n gedreun: die bene het na mekaar toe beweeg, elkeen na die been toe wat by hom pas. ⁸Terwyl ek kyk, kom daar senings en vleis aan hulle en word daar vel bo-oor getrek. Maar daar was nog nie gees in hulle nie. ⁹Toe sê die Here vir my: "Praat nou as profeet met die gees, tree op as profeet, mens, sê vir die gees: So sê die Here my God: Kom uit die vier windstreke, gees, blaas in hierdie dooies in dat hulle kan lewe."

¹⁰Ek het as profeet opgetree soos die Here my beveel het, en toe kom die gees in hulle, en hulle lewe en gaan staan regop. Dit was 'n baie groot menigte. ¹¹Die Here het vir my gesê: "Mens, al hierdie bene stel die hele Israel voor. Hulle sê: 'Ons bene is uitgedroog, ons het geen hoop meer nie, dit is klaar met ons.'¹²Tree op as profeet, sê vir hulle: So sê die Here my God: Ek sal julle grafte oopmaak en julle laat uitkom, my volk, en Ek sal julle terugbring na die land Israel toe. ¹³Wanneer Ek julle grafte oopmaak en julle laat uitkom, my volk, sal julle besef dat Ek die Here is. ¹⁴Ek sal my Gees in julle laat kom sodat julle kan lewe en Ek sal julle in julle land laat woon. Dan sal julle besef dat Ek die Here is. Ek het dit gesê en Ek sal dit doen," sê die Here.

4. Raak stil voor die Here

- Laat toe dat die Heilige Gees die teks vir jou oopbreek.
- Oordink weer die teks... en lees dit dalk 'n 2^e of 3^e keer deur.
- Watter woorde het jou opgeval?
- Watter gedagtes het by jou opgekom?

5. Luister weer na die Woord vanuit die wêreld

- In 2005 was daar 'n TV-reeks genaamd BONES wat gehandel het oor die forensiese patoloog wat allerhande dinge kon aflei uit beendere... hoe oud hulle is, of dit mens of dier s'n was... wat die oorsaak van dood was...
- Hierdie reeks is natuurlik gebaseer op die vakgebied, osteologie, wat die studie van bene is... want bene vertel 'n storie.

- Beendere vertel van geslag, dieet, siektes, lewensstyl, ouderdom, groeikrag en noem maar op.
- Vandag se teks vertel ook van bene... dooie bene. Bene wat ook vertel van 'n doodse toestand van die volk van die Here.
- Maar die teks vertel ook van die krag van God... wat juis sigbaar word as die dooie bene lewe kry.
- Stel jousef nou weer daardie toneel voor: Esegiël – *en ek en jy* – word na hierdie vallei vol doodsheere geneem. Al wat jy kan sien – en ruik en hoor – is die dood!
- Maar dan begin die Gees en die Woord van God – soos gepraat deur Esegïel – werk... en daar gebeur iets...
- Die dooie bene beweeg na mekaar... dit pas in mekaar... dit kry vleis en senings en spierweefsel.
- En as Esegïel weer praat, dan kom die Gees uit die vier winstreke en blaas lewe in daardie dooies in.
- En dan gee God vir Esegïel die opdrag om namens Hom te praat: *“Ek sal my Gees in julle laat kom sodat julle kan lewe en Ek sal julle in julle land laat woon.”*

6. Wat nou?

- Dink vir 'n oomblik na oor ons eie konteks in Suid-Afrika tans?
- Hoe sou jy die “doodsbeendere” van ons bestaan tans beskryf?
- Watter verskil – glo jy – wil die Here hê moet jy maak?
- Watter verantwoordelikheid – glo jy – gee die Here vandag vir jou?
- Leef jy só naby aan die Here dat jy met Hom in gesprek bly, sodat Hy ook vir jou die onderskeiding sal gee om te weet waarmee Hy besig is in en deur jou lewe?

7. Antwoord in gebed

- Dalk voel jy nou lus om te sê: *My Gees is uitgedor, want dit het vergeet om deur U gevoed te word.*
- Bid dan die volgende gebed: *Here, ek smee U om my te bevry...*
 - *van my vrees vir die onbekende toekoms*
 - *van my vrees vir mislukking en armoede*
 - *van my vrees vir verlies en hartseer*
 - *van my vrees vir eensaamheid*
 - *van my vrees vir siekte en pyn*
 - *van my vrees vir ouderdom*
 - *van my vrees vir die dood*
 - *van my vrees vir....*

8. Bely jou geloof in die woorde van Bavinck, vertaal deur Willem Nicol

Ek glo in 'n geheimsinnige iemand wat naby my is, wat binne-in my is, wat my armsalige gespartel en gespook sien, wat my dan stilletjies vashou en my ongemerk van binne uit weer innerlike krag gee.

Ek het dit vele male in my lewe ervaar as ek wegsink en meegevoer word deur die strome van die lewe wat my na onder wil trek.

Maar ek het ook in beslissende oomblikke in my lewe ondervind dat ek opgetel en hoog bo die water gedra word.

Daar was oomblikke dat ek my Bybel sou oopslaan en elke woord daarin vir my dof en vervelend geklink het.

Maar ek het ook oomblikke beleef waarin die woorde as't ware op my afspring, waarin dit glinster en my lewe vul.

En altyd weer was ek oortuig dat daar iemand in my moet wees, iemand wat my vashou, iemand wat my saggies maar ferm in die arms toevou.

Ek glo daarom in die Heilige Gees... die Gees van die Drie-Enige God!

9. Verbind jou tot die lewe

Lees nou die woorde van Lied 531 voordat jy huistoe gaan...

¹ Ons Here, God van alvermoë,
U sal ons met u guns omvou.
U gee aan blindes nuwe oë,
Heer, U laat hul op U vertrou.
Ons volg getrou u Gees se leiding,
God, U is Heer, U skenk bevryding.

² Ons harte sing van u genade,
Heer, U is steeds getrou en goed.
Ons prys U vir u reddingsdade,
ons God wat altyd ons behoed.
Ons wy aan U ons hele lewe,
u eer is hier ons hoogste strewe.



Snap here to pay

PXMP22411

10. Gaan leef tot eer van God

En onthou dat die genade van die Here Jesus Christus, die liefde van God ons Vader en die teenwoordigheid van die Heilige Gees by jou sal wees en bly van nou af en tot in lengte van dae. **AMEN**

Indien jy 'n offergawe wil gee is jy welkom om dit in die kassies by die deure te plaas of om elektronies saam met jou dankoffer oor te betaal of om ons Snapscan hierbo te gebruik.